

gemercket) hat sich mitten in dem Proceß der Fürstliche Leich-
begengnis / solch vngeheurer wetter zugetragen / 45. minuten
oder drey viertel stunden nach zwey vhr auffn abend / nemlich
den 18. Octobris dieses itzlauffenden 1603. Jahrs / zu welcher
zeit der himmel zu Stettin also gestanden / wie nu folget.

In horizonte orientali oder gleich in dem Osten / das ist / in
der spitzen des ersten himlischen hauses / do itzo die Sonne des
morgens zu Stettin auffgehen pfleget / stund domal oriendo
der 19. grad 46. minuten / 17. secunden des feuchten Wasser-
mans / bey welchen flugs dobey an derselben spitze auffgieng
der fixstern ad caudam capricorni, am schwantze des Steinbocks
secundæ magnitudinis, von der art Saturni vnnnd Iouis, vnnnd ein
wenig besser hinab vnter dem Morgenort oder Osten verhielt
sich frigida stella in nare Ceti, der rotzige feuchte vnnnd stürmige
Stern / der in der nase des grossen kalten Himlischen Walfi-
sches sich verhellet / sich aber zum auffgange schicket / vnnnd kurz
hernach / wenn nicht eine halbe stunde verlauffen / auch in wol-
gedachter Fürstlicher Stadt herfür tritt / vnnnd also diese drey
fixstern dieselbige stunde zu nassen blöderigen vnartigen wet-
ter starck disponiren / sonderlich weil dominus ascendentis, nem-
lich Saturnus, im neunden hause des himels an der spitze cor-
poraliter in initio sagittarij, hoc est circa finem scorpij, sich gesetzt
hat / vnnnd fixam in calcaneo Ophiuchi, den stürmigen nassen stern /
so an der fersche des Schlangentregers stehet / bey sich hat /
auch von Saturnischer art / jedoch mit Veneris natur vermi-
schet. Vnnnd weil der feindselige Saturnus im neunden hause /
welches der religion deputieret / im Schützen / welches zeichen
auch ein signum Ioviale ist / vnnnd dazu tonitruosum, wie alle Ma-
thematici wissen / das ist / so zu donnerigem wetter gerne helffen
pfleget / seinen stand ergriffen hat / ja weil der Saturnus noch
dazu vom Marte mit einem feindseligen Quadrat platicè in signo
intercepto, item aus dem siebendem hause / welches ein haus
des tumults vnnnd auffruhrs von den Astrologis geachtet wird /
angefazet ist: so drawet es expresse oder außdrücklich / dieselbe
stunde / schedliche impress oder einfall von feur oder Blitz in die
Gottesheuser oder Kirchen / wie ich mit vielen exempeln dis
beweis